

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama ("Službeni glasnik BiH", broj 38/05), Državna regulatorna komisija za električnu energiju, na sjednici održanoj 27. januara 2011. godine, donijela je

ODLUKU

O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Izdaje se licenca Društvu "KORLEA" d.o.o. Mostar za obavljanje djelatnosti međunarodne trgovine električnom energijom.
2. Licenca iz tačke 1. ove odluke izdaje se za period od 1. aprila 2011. godine do 31. marta 2016. godine.
3. Sastavni dio licence su Uvjeti za korištenje licence za obavljanje djelatnosti međunarodne trgovine električnom energijom.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

"KORLEA" d.o.o. Mostar (u daljem tekstu: podnosilac zahtjeva) podnijela je Državnoj regulatornoj komisiji za električnu energiju (u daljem tekstu: DERK) zahtjev za izdavanje licence za obavljanje djelatnosti međunarodne trgovine električnom energijom, zaprimljen pod brojem: 05-28-12-254/10 od 24. septembra 2010. godine.

Podnosilac zahtjeva je vlasnik početne, odnosno privremene licence za obavljanje djelatnosti međunarodne trgovine, upisane u Registar licenci kod ove Komisije pod registracijskim brojem: 05-28-245-14/08 od 25. marta 2009. godine, čije trajanje će isteći 31. marta 2011. godine. Shodno članu 38. Pravilnika o licencama ("Službeni glasnik BiH", broj 38/05), ne kasnije od 180 dana prije isteka privremene licence ili od roka koji DERK propiše posebnom odlukom, vlasnik licence je u obavezi podnijeti zahtjev za izdavanje nove licence. O ovom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu, regulatoru i operatoru sistema električne enegije u Bosni i Hercegovini ("Službeni glasnik BiH", br. 7/02, 13/03, 76/09 i 1/11).

Zahtjev je podnjet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnjeti uz zahtjev ili predočeni naknadno na zahtjev DERK-a, omogućili DERK-u da razumije, razmotri i odluči o podnjetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-12-254-4/10 od 7. oktobra 2010. godine.

Po pregledu i provjeri svih formalnih elemenata zahtjeva DERK je najprije, u skladu sa obavezom iz člana 10. Pravilnika o licencama, 11. oktobra 2010. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 25. oktobra 2010. godine za dostavljanje komentara javnosti na podnjeti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidovalo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom.

Njegove tehničke, pravne i finansijske mogućnosti permanentno su potvrđivane prethodne dvije godine korištenja privremene licence u toku kojih je dokazivao da djelatnost međunarodne trgovine električnom energijom obavlja u skladu sa Zakonom o prijenosu, regulatoru i operatoru sistema elektricne energije u BiH, pridržavajući se važećih međunarodnih sporazuma i ugovora čiji je potpisnik BiH, a koji se odnose na međunarodnu trgovinu, poštujući Tržišna pravila i Mrežni kodeks, tehničke i komercijalne standarde, odnoseći se prema učesnicima na tržištu na fer i nediskriminirajući način, neprovodeći bilo kakve antikonkurencijske aktivnosti, nezloupotrebljavajući tržišnu moć i nevršeći manipulacije tržištem električne energije, primjenjujući u transakcijama propisane tarife i uredno plaćajući regulatornu naknadu.

Nadzor svih aspekata usklađenosti djelovanja podnosioca zahtjeva sa uvjetima početne odnosno privremene licence u toku njene primjene, pružio je dokaze DERK-u da može pristupiti pripremi početne verzije Uvjeta za korištenje nove licence za obavljanje djelatnosti međunarodne trgovine koja bi važila pet godina. Ovaj dokument je od 27. novembra 2010. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 1. decembra 2010. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a, broj: 05-28-12-254-17/10 od 6. decembra 2010. godine. Ni u ostavljenom roku do 14. decembra 2010. godine, podnosilac zahtjeva nije istakao bilo kakav komentar pa je bilo osnovano zaključiti da prijedlog smatra sačinjenim u skladu sa Zakonom o prijenosu, regulatoru i operatoru sistema električne enegije u Bosni i Hercegovini i podzakonskim propisima koji reguliraju predmetnu materiju.

Pregledom statusa primjene svih komponenti koje su odlučujuće za dodjelu licence, DERK je dobio uvjerljive pokazatelje da podnosilac zahtjeva ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Na osnovu svega naprijed izloženog, te respektirajući okolnost da je podnosilac zahtjeva korisnik prethodno pribavljene dozvole Regulatorne komisije za električnu energiju u Federaciji Bosne i Hercegovine za obavljanje djelatnosti snabdijevanja električnom energijom drugog reda na teritoriji Bosne i Hercegovine, registracijski broj: 06-03-309/9/11 od 1. oktobra 2009. godine, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-254-18/10

Predsjedavajući Komisije

27. januara 2011. godine

Tuzla

Mirsad Salkić